

दिनांक 07.07.2025
 समय: 18.45 बजे
 आकाशवाणी जयपुर-अजमेर
 प्रादेशिक समाचार

- केन्द्रीय खान मंत्री जी. किशन रेड्डी क्रिटिकल मिनरल्स रा आयात मांय कमी लावण सारू सुनियोजित तरीका ऊं काम करण माथे ज़ोर दीनो।
- लोकसभा अध्यक्ष ओम बिरला अंत्योदय संबल पखवाड़ा ने पात्र वंचित लोगों री जिन्दगी मांय सकारात्मक बदलाव लावण वाळो बतायो।
- प्रधानमंत्री नरेन्द्र मोदी आज ब्राजील रा रियो डी जेनेरो मांय वैश्विक स्वास्थ्य सत्र ने संबोधित करेला।
- प्रदेश रा ऊगणी हलका मांय आवता पांच-छह दिन ताई कठे-कठे भारी बिरखा रा आसार।

केन्द्रीय कोयला अर खान मंत्री जी. किशन कह्यो है के राजस्थान मांय बेगा ई लीथियम ब्लॉक्स री पिछाण करी जावेला। श्री रेड्डी आज जयपुर मांय राख्खी ज्या खान मंत्रालय रा रेटिंग पुरस्कार समारोह मांय बोल रह्या हा। वे कह्यो के बेगा ई ब्लॉक्स री नीलामी कर र जमीं हेटे ऊं लीथियम री खुदाई सरू करी जावेला। खबरनवीसां सागे बातचीत करता थकां श्री रेड्डी कह्यो के क्रिटिकल मिनरल्स री दिसावर ऊं मंगायी जावण वाळी तादाद कम करण बाबत् काम करणो व्हेला।

समारोह मांय केन्द्रीय कोयला अर खान मंत्री कह्यो के खनन हलका रो विकास अर रोजगार ने बधावो देवण मांय मोटो काम है। वे कह्यो के ई सागे ही खानां मांय मजूरां री हिफाजत अर वां रा भला रा कामां माथे ई पूरो ध्यान दियो जावणो चाहिजे।

ई मौके मुख्यमंत्री भजनलाल शर्मा कह्यो के सरकार जमीं हेटे ऊं खुदाई अर पर्यावरण बीचे तालमेल माथे खास ध्यान दे रही है। वे निवेशकां ने न्यौतो देता थकां कह्यो के राज्य मांय खान हलका मांय घणी संभावनावां है। मुख्यमंत्री कह्यो के प्रदेश मांय 82 भांत रा धात्विक अर अधात्विक खनिज है, ज्यां मांय ऊं 57 भांत रा खनिज जमीं हेटे ऊं निकाळ्या जा रह्या है।

कार्यक्रम मांय पांच सितारा रेटिंग वाली 95 अर सात सितारा रेटिंग वाली तीन खदानां रा नुमाइंदां रो मान करी ज्यो। मुख्यमंत्री भजन लाल शर्मा अर केंद्रीय कोयला अर खान मंत्री खान विभाग रा कामकाज रो जायजो लेवण सारू अहलकारां सागे मीटिंग ई कीनी। मुख्यमंत्री रा रेहवास माथे व्ही मीटिंग मांय नीलाम करी ज्यो ब्लॉक्स ऊं खुदाई रो काम बेगो ई सुरू करण अर नुवा खनिज ब्लॉक्स री पिछाण करण समेत न्यारा-न्यारा मुद्दां माथे चर्चा करीजी।

.....

मुख्यमंत्री भजनलाल शर्मा आज राज्यपाल हरिभाऊ बागडे सागे जयपुर रा राजभवन मांय मुलाकात कीनी। श्री शर्मा राज्यपाल सागे प्रदेश रा विकास ऊं जुड़्या मुद्दां माथे चर्चा कीनी।

.....

लोकसभा अध्यक्ष ओम बिरला आज कोटा जिला रा सांगोद मांय पंडित दीनदयाल उपाध्याय अंत्योदय संबल पखवाड़ा रा तैत लगायी ज्यो शिविर ऊं सांगोद विधानसभा हलका मांय सुपोषित मां अभियान रो उद्घाटन कीनो। अभियान रा तैत सांगोद विधानसभा हलका री आस वाली करीब डोढ़ हजार लुगाइयां ने पोषण किट बांट्या जावेला। लोकसभा अध्यक्ष री पहल पाछे ऊर्जा मंत्री हीरालाल नागर ई वां रा विधानसभा हलका सांगोद मांय ओ अभियान चलायो है। ई मौके श्री बिरला कह्यो के समाज रा आखिरी छोर रा लोगां री जिन्दगी मांय बदलाव लावण सारू ही सम्बल पखवाड़ो चलायो जा रह्यो है।

.....

कार्यक्रम मांय मुख्यमंत्री भजन लाल शर्मा ई मौजूद रह्या। ई दौरान 92 करोड़ रुपया रा खर्चा वाळा विकास रा कामां री सुरूआत कीनी अर पूरा व्ह्या काम जनता ने संप्या।

.....

भरतपुर मांय आज सम्बल पखवाड़ा रा तैत तीन सौ पिरवारां ने मकान रा पट्टा दिया ज्यो। जिला कलेक्टर कमर चौधरी कच्चा परकोटा हलका रा लोगां ने अ पट्टा संप्या।

.....

प्रधानमंत्री नरेन्द्र मोदी रो आज ब्राजील रा रियो डी जेनेरो मांय वैश्विक स्वास्थ्य सत्र ने सम्बोधित करण रो कार्यक्रम है। प्रधानमंत्री अंतर्राष्ट्रीय सौर गठबंधन, आपदा-रोधी बुनियादी ढांचा, जैव ईंधन गठबंधन अर बिग कैट मिशन रा बारा मांय ई चर्चा करेला। काल आतंकवाद रो सामो करण सारू मिल र काम करण, गोपनीय जाणकारियां एक-दूजा ने मुहैया करावण अर नवीकरणीय ऊर्जा अर कृषि अनुसंधान मांय मदद ऊं जुड़्या चार करार माथे ई सही करी जावेला। इण ऊं पैली ब्रिक्स शिखर सम्मेलन रे दौरान एक संवाद सत्र मांय श्री मोदी कह्यो के किण ई देश ने खास खनिजां, प्रौद्योगिकी अर आपूर्ति श्रृंखला ने स्वार्थ सारू हथियार रा रूप मांय काम नी लेवणा चाहिजे।

.....

कृषि अर किसान कल्याण मंत्री शिवराज सिंह चौहान देश मांय मक्का री खेती ने बधावो देवण सारू **बहु-हितधारक** नजरियो अपणावण बाबत् कह्यो है। वे कह्यो के ई सारू वैज्ञानिकां, किसानां, कृषि विश्वविद्यालयां अर उद्योगां ने मिल र काम करणो चाहिजे।

.....

कृषि मंत्री आज नई दिल्ली मांय फिक्की रा 11वों **भारत मक्का शिखर सम्मेलन** मांय बोल रह्या हा। ई मौके श्री सिंह मक्का री खेती मांय योगदान करण वाळा किसानां रो मान कीनो। श्री चौहान **एक राष्ट्र, एक कृषि और एक टीम** री सोच वाळी टीम बणावण माथे ज़ोर दीनो।

.....

देश रा हर रेहवासी ताई बैंकिंग सुबीता अर सामाजिक हिफाजत री योजनावां पूगावणो तैय करण रा मकसद ऊं केन्द्र सरकार वित्तीय समावेशन सारू देशभर मांय अभियान चलायो है। वित्त मंत्रालय रा वित्तीय सेवा विभाग री ओर ऊं एक जुलाई ऊं चलायी ज्यो ओ अभियान 30 सितम्बर ताई चालेला। संतुष्टि अभियान री जाणकारी देवण सारू आज जयपुर मांय राख्यी ज्यी प्रेस वार्ता मांय पत्र सूचना कार्यालय री अपर महानिदेशक ऋतु शुक्ला अभियान रा तैत कर्या जा रह्या वित्तीय समावेशन ऊं जुड़्या कार्यक्रमों री जाणकारी दीनी। राज्य स्तर री बैंकर्स समिति-एसएलबीसी री आज जयपुर मांय व्ही प्रेस वार्ता रे दौरान बैंक ऑफ बड़ौदा रा महाप्रबंधक अर समिति रा संयोजक एम. अनिल आ जाणकारी दीनी। वे बतायो के अभियान रा तैत ग्राम पंचायतां मांय वित्तीय सेवावां मुहैया करावण सारू शिविर लगाया जा रह्या है। वे बतायो के अभियान रा तैत प्रधानमंत्री जन-धन योजना रा तैत खोली ज्यो पण काम नी आ रह्या खातां रो ओजू सत्यापन करायो जा रह्यो है।

.....

राज्य मांय सैर-सपाटा अर नौकरी-धंधा री नुवी संभावनावां री तलाश सारू सरकार केई जतन कर रही है। नागरिक उड्डयन राज्य मंत्री गौतम कुमार दक बतायो के ई सारू प्रदेश री खास-खास ठोड़ां ने **क्षेत्रीय हवाई सम्पर्क योजना** रे जरिये एक दूजा ऊं जोड़बा रो प्रस्ताव केन्द्र ने भेजी ज्यो है। फिलहाल प्रदेश मांय 19 हवाई पट्टियां अर 118 हैलीपेड है। सगळा जिला मुख्यालयां, सैर-सपाटा री खास ठोड़ां, चिकित्सा सहायता अर इमरजेंसी रिस्पॉन्स सारू ई और हैलीपेड बणावण री प्रक्रिया चाल रही है। ई सागे ई हैलीकॉप्टर पर्यटन अर जॉयराइड सेवावां ई प्रस्तावित है। राज्य सरकार माउंटआबू, सीकर, सवाईमाधोपुर, भीलवाड़ा अर श्रीगंगानगर ने ई ई योजना मांय भेळा करण रो प्रस्ताव ई केन्द्र सरकार ने भेजी ज्यो है। बीकानेर, जोधपुर अर किशनगढ़ ऊं मुम्बई, कोलकाता, सूरत अर बैंगलूरू सारू नियमित उड़ानां सारू करण रो आग्रह करी ज्यो है।

.....

राज्य रा भरतपुर, जयपुर अर कोटा संभाग मांय आवता 5-6 दिन ताई कठे-कठे भारी बारिश व्हेवण रा आसार है। मौसम विभाग कोटा अर उदयपुर संभाग मांय आवता तीन दिन मांय कठे-कठे भारी ऊं घणी भारी बिरखा री संभावना जतायी है, हालांकि जोधपुर संभाग मांय बारिश मांय कमी आवण रा आसार है। हालांकि बीकानेर संभाग मांय कठे-कठे हल्की बारिश रो अंदाजो है। ई बीचे, श्रीगंगानगर अर झालावाड़ मांय आज हल्की बरसात व्ही, जदके भीलवाड़ा मांय आखा दिन सीळो बायरो बाज्यो।

.....